

A actividade hostaleira é unha parte esencial da actividade económica da cidade de Lugo.

Dende sempre os negocios de hostalería complementa os seus servizos coa instalación de terrazas para aproveitar o bo tempo e, no caso da cidade histórica, a beleza da contorna, o cal non é de ningún xeito un fenómeno exclusivo de Lugo, senón que é algo habitual en case que todas as cidades de Europa.

A Declaración de Conxunto Histórico-Artístico do Recinto Intra Muros da cidade de Lugo no ano 1973, así como a proclamación da nosa Muralla como Patrimonio Mundial, obrigounos á e aos lucenses a coidar especialmente a nosa imaxe urbana, correspondéndolle ao Concello adoptar as medidas precisas e esixirle á cidadanía o seu cumprimento, para fomentar a valoración e mellora do conxunto estético da cidade.

Por este motivo, no ano 2000 aprobouse por primeira vez un Bando de Alcaldía que recollía normas aplicables á instalación de terrazas na vía pública.

Posteriormente, no ano 2009, incluíronse por primeira vez normas sobre o mobiliario, e o 18 de febreiro de 2010 tamén se aprobou un Bando de Alcaldía "para establecer regulamentación relativa á instalación de terrazas na vía pública".

En XGL de 27 de xuño do ano 2012 acordouse establecer os criterios relativos á instalación de terrazas na vía pública, nos que se estableceron as condicións xerais para a instalación de terrazas, así como o equipamento autorizado, téndose en conta a Orde do Ministerio de Vivenda VIV/561/2010, de 1 de febreiro, derogada posteriormente pola Orde TMA/851/2021, de 23 de Xullo, pola que se desenvolve o documento técnico de condicións básicas de accesibilidade e non discriminación para o acceso e utilización dos espazos públicos urbanizados.

A crise sanitaria do COVID-19 veu mudar, tanto por necesidades sanitarias como polos cambios que se produciron nos nosos costumes, a visión que por parte dos usuarios temos das mesmas, non so como un lugar de lecer e expansión, senon tamen como unha "ferramenta de seguridade" fronte ás sucesivas vagas de contaxios e como prevención fronte a un futuro sanitario incerto.

Para atender nun primeiro momento as necesidades sanitarias e tamén para contribuír á revitalización do sector hostaleiro, tan importante na economía local, publicouse o 20 de maio de 2020 un Bando Extraordinario, ofrecendo ás e aos titulares dos establecementos de hostalería a posibilidade de incrementar a superficie destinada a terraza, para aqueles que xa a tiñan, ou instalalas de novo para aqueles que non a tiñan, especificándose que se trataba dunha medida de urxencia, excepcional e temporal, con vixencia ata o 31 de agosto do 2020.

Posteriormente, en data 1 de setembro do 2020, un novo Bando de Alcaldía estableceu a prórroga desta medida excepcional ata o 2 de novembro do ano 2020.

Antes da redacción desta Ordenanza reguladora de terrazas, a regulación deste tipo de actividades hostaleiras neste Concello non estaba suficientemente desenvolvida, non abarcando todo o solo público urbanizado da nosa cidade, como determinadas condicións imprescindibles para adaptarnos a nova legislación, así coma aos novos tempos post-pandemia. A norma reguladora limitábase a uns poucos artigos que non resolvían os moitos condicionantes que orixina o uso da vía pública cunha terraza de hostalería; así, por exemplo, non regulaba o caso das terrazas sitas nos solos privados; non prevía a posibilidade de instalar peches estables (algo frecuente noutras cidades ben próximas a Lugo e que constituía unha discriminación para as e os hostaleiros de Lugo con respecto aos doutras cidades españolas); non se prevían medidas de uniformización e mellora do mobiliario das terrazas, algo fundamental nunha cidade co extraordinario conxunto histórico-artístico do centro histórico de Lugo. Así mesmo, a disciplina de terrazas tamén estaba escasamente regulada.

Esta nova norma, trata de resolver as eivas da anterior normativa e dar resposta ás vellas demandas dos empresarios de hostalería pero sen esquecer a mellora das medidas de disciplina ou a estética destas instalacións de xeito que se atopen á altura que esixe unha cidade histórica como é Lugo.

Trátase de que as terrazas presenten un aspecto máis ordenado, unha mellora na estética de moitas delas e unha mellora na delimitación do espazo que ocupan.

Polo tanto, entendemos que é hora de acometer unha regulación integral e minuciosa dun sector de actividade tan importante para a cidade e moito máis en tempo de crise e de aumento do desemprego, como é o das terrazas de hostalería, para o cal propónse a presente ordenanza, cuxos artigos quedarán redactados como segue:

TITULO PRELIMINAR

Disposicións xerais

Artigo 1.- Obxecto

Esta ordenanza ten por obxecto establecer o réxime xurídico aplicable á instalación e funcionamento das terrazas, con ou sen pechamento estable de hostalería, con excepción dos recintos de feiras e festexos populares que se autoricen con motivo da celebración de festas patronais, ou similares, que se rexerán pola súa ordenanza municipal específica.

Artigo 2.- Tipos de instalacións autorizables

Para os efectos desta ordenanza, as instalacións autorizables defínense da seguinte forma:

1. Terrazas: son as instalacións formadas por mesas, cadeiras, antucas, toldos, xardineiras e outros elementos de mobiliario urbano móbiles e desmontables, que desenvolven a súa actividade de forma accesoria a un establecemento hostaleiro. Estas instalacións poderán situarse no solo público ou no privado.

Así mesmo, poderán instalarse terrazas como actividade accesoria aos establecementos hoteleiros mesmo se non contan cunha licenza específica de establecemento de hostalería. Nos bares e restaurantes que teñan a consideración de usos asociados de edificios exclusivos de uso terciario, tales como hoteis ou centros comerciais, centros culturais, etc., tamén poderán situarse nos espazos libres de parcela de titularidade privada e nos respectivos patios interiores. En todos os casos só se poderá realizar a mesma actividade e expender os mesmos produtos que o establecemento do que dependen.

2. Terrazas con pechamento estable: son terrazas pechadas no seu perímetro e cubertas mediante elementos desmontables que se encontran en terreos de titularidade e uso público ou nos espazos libres de parcela de titularidade privada e nos respectivos patios interiores, que desenvolvan a súa actividade de forma accesoria a un establecemento principal de hostalería. Só poderán realizar a mesma actividade e expender os mesmos produtos que o establecemento do que dependen.

Tamén poderán instalarse esta clase de terrazas nos establecementos aos que fai referencia o segundo parágrafo do apartado primeiro deste artigo.

Artigo 3.- Normativa aplicable

As instalacións reguladas no artigo anterior quedarán suxeitas, ademais, á normativa sobre espectáculos públicos e actividades recreativas, así como á de protección do patrimonio, polo que as súas determinacións serán plenamente esixibles aínda cando non se faga expresa referencia a elas nesta ordenanza.

Artigo 4.- Autorizacións

1.- A implantación destas instalacións require a previa obtención de autorización municipal nos termos previstos nesta ordenanza e na normativa sectorial aplicable. O documento de autorización, o seu plano de detalle e as homologacións dos elementos instalados, ou unha fotocopia destas, deberán encontrarse no lugar da actividade, visibles para a s e os usuarios e a veciñanza, e a disposición dos funcionarios municipais e efectivos da Policía Municipal.

2. Esta autorización incluírá a licenza demanial de ocupación de terreos, cando sexan obxecto de ocupación terreos de titularidade pública e a licenza urbanística no suposto de terrazas con pechamentos estables.

3. A autorización aprobada por órgano competente emitírase en modelo oficial, que deberá incluír, polo menos, as dimensións do espazo sobre o que se autoriza, a súa situación, os toldos e antucas e as súas características, o horario, as limitacións de índole ambiental ás que queda condicionada e o número total de mesas e cadeiras autorizadas. Nas terrazas con pechamento estable indícaranse ademais as súas características. En todo caso, xunto coa autorización deberá figurar copia do plano de detalle da instalación que serviu de base á súa concesión, debidamente selado e rubricado polo técnico que realizou a proposta favorable e as homologacións dos elementos instalados.

4. Cando concorran circunstancias de interese público que impidan a efectiva utilización do solo para o destino autorizado, tales como obras, acontecementos públicos, situacións de emerxencia ou calquera outra, a autorización quedará sen efecto ata que desaparezan as ditas circunstancias, sen que se xere dereito a indemnización ningunha. As autorizacións poderán ser revogadas unilateralmente pola administración concedente en calquera momento por razóns de interese público, sen xerar dereito a indemnización, cando resulten incompatibles coas condicións xerais aprobadas con posterioridade, produzan danos no dominio público, impidan a súa utilización para actividades de maior interese público ou menoscaben o uso xeral.

5. As autorizacións quedarán condicionadas á utilización ou reparación das bocas de rego, tapas e rexistros e outras instalacións que estivesen na súa área de ocupación.

6. As autorizacións concedidas outórganse sen prexuízo de terceiros e mantendo a salvo o dereito de propiedade.

7.- Unha vez concedida a autorización de instalación (de 6 ou 3 meses, ou ano natural), só se permitirá a modificación dos termos da autorización concedida en supostos moi xustificados que a persoa solicitante deberá razoar, aportando os documentos e probas necesarias.

En ningún caso se tramitarán nunha mesma tempada máis dunha solicitude de modificación.

Artigo 5. Carencia de dereito preexistente

1.- Instalacións que se soliciten en terreos de titularidade e uso público: en virtude dos principios de non alleamento e non prescrición dos bens de dominio público, a mera concorrencia dos requisitos necesarios para que a ocupación poida ser autorizada non outorga dereito ningún á súa concesión. O Concello, considerando todas as circunstancias reais ou previsibles, poderá conceder ou denegar a autorización, facendo prevalecer o interese xeral sobre o particular.

2.- Instalacións que se soliciten en terreos de titularidade e uso privado: o órgano competente, considerando as circunstancias reais ou previsibles, e tendo en conta o carácter regrado deste tipo de autorizacións, deberá concedelas ou denegalas motivadamente.

Artigo 6. Horarios

1.- O horario de funcionamento das terrazas situadas en solo de titularidade e uso público, así como das terrazas situadas en solos privados, será ata a 1:00 hora da madrugada nos meses de maio, xuño e setembro durante a semana, e ata as 2: 00 horas da madrugada os sábados (noites de venres a sábado), véspera de festivo e domingos (noites do sábado ao domingo). Os meses de xullo e agosto o horario de peche será as 2:30 horas da madrugada tódolos días. O resto do ano, do 1 de outubro ao 30 de abril, o horario de peche será ás 23:30 horas entre semana e ás 00:30 horas en sábados (noites do venres ao sábado), véspera de festivo e domingos (noites do sábado ao domingo) podendo prorrogarse en época de festas.

Rematado o tempo de permanencia, a limpeza e retirada ou acopio do mobiliario constitutivo da terraza levarase a cabo no prazo máximo de 30 minutos. En todo caso a operación de retirada ou acopio do mobiliario debe facerse sen causar molestias á veciñanza.

As autorizacións poderán ser anuais, semestrais ou trimestrais, sendo a anual a que vai desde o 1 de xaneiro ao 31 de decembro, a semestral a que vai dende o 1 de maio ao 31 de outubro, e trimestral a que vai do 1 de xullo ao 31 de setembro. No suposto de non solicitarse a renuncia á autorización, esta entenderase prorrogada automaticamente en iguais termos.

2.- O horario de funcionamento das terrazas con pechamentos estables será o mesmo fixado no apartado anterior.

3.- Os horarios establecidos neste artigo poderán ser modificados, por circunstancias xustificadas, mediante decreto da Alcaldía.

4.- O horario recollido neste artigo refírese ao tempo de funcionamento das terrazas que se atopan ao aire libre ou dentro de pechamentos estables ubicados na vía pública, que non se aplica ás mesas de cadeiras ubicadas no interior dos locais, en espazos abertos comunicados coas terrazas, e que terán o mesmo horario de apertura que teña o establecemento.

Artigo 7. Limitación de niveis de transmisión sonora

O funcionamento das instalacións reguladas nesta ordenanza, tanto en solo público como privado, deberá respectar os límites de ruído en vivendas e locais próximos previstos na Ordenanza Xeral Municipal Reguladora de Contaminación Acústica (BOP 16-12-1997)

Artigo 8. Seguro de responsabilidade civil

O titular da autorización deberá dispor dun seguro de responsabilidade civil e incendios do establecemento principal que deberá estender a súa cobertura aos posibles riscos que puideran derivarse do funcionamento da instalación de terrazas..

Artigo 9. Homologacións-publicidade

1. No ámbito de aplicación do Plan especial de Protección, Rehabilitación e Reforma Interior do Recinto Amurallado de Lugo e sua Zona de Influencia (PEPRI) da cidade histórica, homologase o mobiliario fabricado cos seguintes materiais: madeira, vimba, ferro forxado e materiais que imiten aos anteriores cunha calidade acordo coa contorna, prohibíndose materiais plásticos, aceiro inoxidable e aluminio nas súas cores naturais ou acabados metalizados brillantes.

Valoraranse proxectos individualizados, que pola singularidade e valor de conxunto que presenten, empreguen outros materiais que os recollidos no parágrafo anterior.

No que se refire ás cores, homológanse as cores orixinais dos materiais, así como o negro, o branco, o castaño, o marrón nas súas diferentes tonalidades, o verde e o gris nas súas diferentes tonalidades. As formas do mobiliario serán acordes co entorno.

2. Fóra do ámbito de aplicación do PEPRI, admítense os anteriores materiais, engadíndose outros novedosos que pola súa singularidade aporten valor ao proxecto presentado, sempre que estes teñan unha calidade adecuada co entorno, prohibíndose aceiro inoxidable e aluminio nas súas cores naturais ou acabados metalizados brillantes.

Valoraranse proxectos individualizados, que pola singularidade e valor de conxunto que presenten, empreguen outros materiais que os recollidos no parágrafo anterior.

Con respecto ás cores, evítanse as tonalidades excesivamente rechamantes.

3. Prohíbese a publicidade visible desde o exterior da terraza nos elementos de mobiliario instalados nelas ou nos seus elementos fixos, permitíndose a colocación do nome do establecemento ou do seu logotipo en toldos e antucas. Pode colocarse publicidade que só sexa visible desde o interior da terraza nos seus elementos ou en pantallas de televisión.

Artigo 10. Condicións de uso das instalacións

1. Os titulares das autorizacións ou concesións deberán manter as instalacións e cada un dos elementos que as compoñen nas debidas condicións de limpeza, seguridade e ornato. Para este fin, estarán obrigados a dispor dos correspondentes elementos de recollida e almacenamento de residuos.

2. Por razóns de estética e hixiene non se permitirá almacenar ou amorear produtos, materiais ou residuos propios da actividade xunto ás terrazas nin fóra da instalación dos pechamentos estables de terrazas.

3. O espazo autorizado á terraza deberá estar sempre ben delimitado, tanto por paredes ou outros elementos arquitectónicos xa existentes, como por pechamentos móbiles que cumpran esta función. Darase preferencia ao emprego de xardineiras e elementos vexetais para a delimitación das terrazas, para o cal poderanse empregar xardineiras de materiais plásticos e lixeiros, se ben coidarase a estética e o deseño destes elementos de mobiliario. Tamén se poderán empregar peches de madeira con forma de balaustrada, tanto cando as mesas e cadeiras se atopen sobre o chan como nos casos nos que se atopen sobre unha tarima.

Artigo 11. Condicións das subministracións

1. As acometidas de auga, saneamento e electricidade deberán ser subterráneas e realizarse cumprindo a súa normativa reguladora.

2. Os contratos de servizos para estas acometidas correrán por conta do titular da autorización ou concesión e deberán celebrarse coas compañías subministradoras do servizo.

Artigo 12. Condicións hixiénico-sanitarias e de consumo

As instalacións reguladas nesta ordenanza deberán manterse en adecuadas condicións hixiénico-sanitarias.

Artigo 13. Fianza

1. Nos casos nos que os técnicos do Concello o estimen necesario para responder de posibles danos en bens e servizos público, será precisa a constitución dunha garantía para responder das posibles deterioracións que se poidan causar ao dominio público e ás súas instalacións.

2. O importe desta garantía determinarase en función do custo de reposición do solo ocupado.

3. As fianzas deberán constituírse na conta bancaria municipal que fixe a Tesourería Municipal.

TÍTULO I

Terrazas

Capítulo 1

Condições técnicas para a instalación

Artigo 14. Restricións pola actividade á que se adscriba

1. Concederáse autorización para a instalación de terrazas cando sexan accesorias a un establecemento principal de hostalería.

2. Así mesmo poderán instalarse terrazas como actividade accesoria aos establecementos hoteleiros mesmo se non contan cunha licenza específica de establecemento de hostalería, así como en edificios exclusivos de uso terciario como centros comerciais, centros culturais, etc. Aos bares e restaurantes que teñan a consideración de usos asociados en edificios exclusivos de uso terciario poderáselles autorizar igualmente a instalación de terraza tanto nos espazos libres de parcela de titularidade privada como nos patios interiores privados.

Artigo 15. Condições do espazo no que se pretenda situar a terraza

1. As terrazas que pretendan instalarse en solo de titularidade e uso público deberán cumprir as seguintes condicións:

- a) Con carácter xeral, a largura libre de paso non poderá ser inferior a un metro oitenta, respectándose un itinerario de forma continua, evitando quebras ao longo dunha liña de quinceiro.
- b) Algunha das fachadas do establecemento deberá dar fronte ao espazo proxectado para a instalación da terraza excepto no ámbito do Plan Especial ou en espazos peonís.

2. Cando o grao de inclinación da rúa o aconselle instalaranse tarimas sobre as que se ha situar o mobiliario da terraza. Estas tarimas serán de madeira tratada para ser instalada no exterior e axustaranse aos modelos homologados polo Concello. En ningún punto presentarán un desnivel con respecto á rúa que supere os 50 centímetros de alto polo que, se a inclinación da rúa obriga a iso, poderán ser graduais. Os biombos e elementos de seguridade estarán ancorados á tarima.

3. Aínda cando un espazo reúna todos os requisitos para a colocación dunha terraza, esta poderá non autorizarse ou autorizarse con dimensións inferiores ás solicitadas se a súa instalación dificultara o tránsito peonil, aínda que soamente sexa en determinadas horas.

4. Cando a concentración de terrazas sobre unha praza ou espazo determinado poida supor a alteración do seu destino natural ou xerar un grave impacto medioambiental, as solicitudes de novas instalacións ou as renovacións serán resoltas conxuntamente con anterioridade ao inicio do ano natural, establecéndose as condicións ou restricións que se estimen adecuadas.

5. Non se autorizará a colocación nas terrazas de elementos fixos cando poidan obstaculizar o paso dos vehículos de emerxencias pola excesiva estreiteza da rúa.

Artigo 16. Modalidades de ocupación

A ocupación de solo de titularidade e uso público con terrazas axustarase ás seguintes modalidades e condicións:

1. Se a terraza se situase xunto á fachada do edificio, a súa lonxitude non poderá rebordar a porción desta ocupada polo establecemento.
2. Se a terraza se situase na liña de bordo da beirarrúa, a súa lonxitude poderá alcanzar a da fronte de fachada do edificio propio e dos lindantes.
3. Permitirase a implantación simultánea dunha terraza xunto á fachada e outra na liña de bordo no mesmo tramo de beirarrúa sempre que se deixe un paso cunha largura dous metros como mínimo, que poderá ser ampliado se así o consideran conveniente os técnicos municipais.

4. Se máis dun establecemento dun mesmo edificio solicita autorización de terraza, cada un poderá ocupar a lonxitude da fronte da súa fachada, repartíndose o resto da lonxitude da fachada propia e a dos dous lindeiros a partes iguais. Neste caso, mante. rase entre elas unha separación mínima de 1 metro, que se repartirá entre as dúas terrazas.

No caso de que se abra un novo establecemento de hostalería e que a súa fachada estea ocupada, en todo ou en parte, por unha terraza autorizada anteriormente a outro establecemento lindante, ambos establecementos deberán suxeitarse ao previsto no parágrafo anterior cando se proceda á renovación do permiso de terraza xa autorizada.

A distancia dos elementos de mobiliario urbano ao bordo da beirarrúa será, como mínimo, de 0,50 metros, podendo reducirse ata 0,30 metros cando haxa unha barreira de protección.

5. Con carácter xeral a terraza deberá situarse acaroada á fachada do establecemento e a súa lonxitude limitarase á da fachada do local do que é auxiliar.

Xustificadamente, poderá estar separada do local ata un máximo de vinte metros.

a) Cando a terraza se sitúe acaroada á fachada ou na liña de bordo da beirarrúa e sempre que non se soliciten ambas ocupacións simultaneamente, poderá autorizarse superar os límites da fachada do establecemento, previa solicitude debidamente fundamentada á que debe achegarse autorización dos propietarios dos locais comerciais extremeiros.

Xunto co interese público, a Administración valorará para conceder ou non a autorización os seguintes aspectos entre outros tecnicamente xustificadas:

- Características e morfoloxía de cada un dos espazos.
- Impacto visual.
- Fluxos de persoas e vehículos.
- Permisibilidade para o acceso de servizos públicos .
- Afectación para a funcionalidade dos servizos públicos.
- Afectación á accesibilidade universal.

b) A autorización para situar a terraza separada do establecemento menos de vinte metros, poderá concederse previa solicitude debidamente fundamentada á que debe achegarse autorización dos propietarios dos locais comerciais extremeiros.

Xunto co interese público, a Administración valorará para conceder ou non a autorización os seguintes aspectos entre outros tecnicamente xustificadas:

- Características e morfoloxía de cada un dos espazos.
- Impacto visual.
- Fluxos de persoas e vehículos.
- Permisibilidade para o acceso de servizos públicos .
- Afectación para a funcionalidade dos servizos públicos.
- Afectación á accesibilidade universal.
- Recorrido entre o local e a actividade de terraza complementaria.

c) En ningún dos supostos de ocupación contemplados na Ordenanza, poderá ocuparse espazo fronte ou acaroado a portais de entrada de vivendas .

6. O largo das terrazas obterase de acordo co artigo 15. Se os establecementos se encontraran enfrontados, o largo ocupado por ambas non superará os valores indicados no citado artigo.

7. Cando a terraza estea separada do establecemento poderá colocarse unha instalación de apoio. Este elemento de apoio ten carácter de instalación auxiliar para facilitar o desenvolvemento da actividade. Servirá exclusivamente de soporte aos elementos de enxoval e aos produtos destinados ao consumo na terraza. Non poderá utilizarse como barra de servizo, para realizar funcións de cociñado, elaboración ou manipulación de alimentos, nin dedicarse a ningún outro uso que desvirtúe o seu carácter estritamente auxiliar. A instalación será empregada unicamente por camareiros e persoal da terraza e non se permitirá atender desde ela ao público en xeral. En calquera caso, poderase prohibir a instalación deste elemento de apoio por razóns estéticas ou se pode entorpecer a circulación.

As dimensións máximas da instalación serán de 2,50 metros de longo por 0,50 metros de largo, non podendo superarse en ningún punto 1 metro de altura; admitirase a instalación de teito cunha cota máxima respecto ao solo de 2,50 metros e sen pechamentos laterais por encima da súa altura máxima.

Non se autorizará en ningún caso a colocación de equipos de son nin de elementos ornamentais de calquera índole.

Non poderá dispor de equipos de lavado mecánico, vertedoiro con sistema de acción non manual, billas para a dispensación de bebidas e equipos de conservación de produtos.

Queda prohibida a almacenaxe de elementos fóra da instalación de apoio.

8. As terrazas poderán instalarse en zonas da calzada da vía pública sempre que se cumpran os requisitos de seguridade esixibles e que non afecten á circulación rodada ou ao tráfico de peóns (e sempre que non estean delimitadas como estacionamento ou zona de carga e descarga e parada de autobús urbano??)

En caso de colocación de terraza en zonas de estacionamento situadas a distinto nivel da beirarrúa, e salvo que circunstancias obxectivas de calquera índole o impidan, colocarse unha tarima debidamente sinalizada e que cumpra requisitos de accesibilidade.

En todo caso haberá que preservar as zonas de paso de peóns.

Procederase a denegar o permiso de instalación da terraza nos casos nos que as características da rúa, do tráfico ou razóns de seguridade o aconsellen.

Artigo 17. Condicións para a instalación da terraza e do seu mobiliario

Os elementos de mobiliario urbano que se instalen están suxeitos ás seguintes prescricións:

1. Non poderán colocarse en solo de titularidade e uso público mobiliario, elementos decorativos ou revestimentos de chan que non estean incluídos expresamente na autorización.
2. O módulo tipo está constituído por unha mesa e catro cadeiras enfrontadas dúas a dúas. Considerarase unha superficie de ocupación teórica por cada terraza de 1,60 x 1,60 metros.
3. Autorizaranse tamén os seguintes módulos:
 - a) Unha mesa e dúas cadeiras de 1,60 x 0,80 metros, que pode reducirse a 1,60 x 0,60 cando a estreitura do espazo o aconselle sempre que se deixe libre o paso mínimo para peóns de 1,80 metros.
 - b) Un módulo 1,20 x 1,80 cunha mesa rectangular e catro cadeiras, con dous cadeiras a cada lado longo da mesa.
 - c) Unha mesa alta con catro banquetas, de 1,20 x 1,20 metros cadrados. Poderá substituírse a mesa alta por un barril tradicional de madeira e aros de forxa.
 - d) Unha mesa alta con dúas banquetas, de 1,20 x 0,60.

4. As mesas e cadeiras poderán dispoñerse como mellor conveña sempre que se permita o doado acceso a todas as mesas e cadeiras, para o cal establecerase un corredor intermedio que permitirá o acceso aos camareiros ás mesas.

Este corredor terá unha lonxitude igual á da fila menor e unha largura de 0.50 metros.

A superficie ocupada polo corredor contabilizarase dentro da superficie de ocupación da terraza. Para a obtención do número máximo de mesas e cadeiras aplicaranse os módulos descritos neste artigo.

Dentro da superficie de ocupación autorizada, o total do número de mesas e cadeiras poderá dispoñerse como mellor conveña, podéndose variar a súa disposición pero non o seu número, a superficie e os límites do ámbito autorizado.

No ámbito do Plan especial (PEPRI) instalaranse os toldos de acordo co previsto neste plan. Fóra do ámbito do PEPRI, os toldos serán de material téxtil, lisos, de cores acordes coa contorna urbana e terán sempre posibilidade de seren recollidos mediante fácil manobra. Queda prohibido o pechamento das superficies verticais do seu perímetro. Admítase a colocación do nome do establecemento e do seu logotipo sobre as faldras de toldos e antucas.

5. Non poderá obstaculizarse o acceso á calzada desde os portais dos predios nin dificultar as manobras de entrada ou saída nas pasaxes permanentes. Cando a terraza se coloque acaroadá á fachada deberán deixarse libres, cando menos, 0,50 metros desde as couzoiras das portas. Nestes espazos non poderá colocarse tampouco mobiliario accesorio.

Non obstante, pode non deixarse esta distancia de 0,50 metros sempre que a comunidade de propietarios afectada autorice que non se deixe esta distancia ata o seu portal.

6. Cando se dispoña de instalación eléctrica de alumeado para a terraza, esta deberá reunir as condicións que o Regulamento Electrotécnico de Baixa Tensión e Instrución Técnica Complementaria (R.D. 842/2002 de 2 de agosto), Instrución Técnica nº 30 establece para instalacións en locais mollados. Os condutos quedarán fóra do alcance de calquera persoa e non poderán discurrir polas beirarrúas nin utilizar as árbores ou o mobiliario urbano como soporte. En ningún caso os focos poderán cegar ou producir outras molestias á veciñanza, viandantes ou vehículos.

Esta instalación deberá ser revisada anualmente por un instalador autorizado que emitirá o correspondente boletín de conformidade.

7. Queda prohibida a instalación de máquinas expendedoras automáticas, recreativas, de xogos de azar, billares, futbolíns ou calquera outra de características análogas. Tampouco se instalarán barras fixas na fachada dos establecementos.

8. A utilización dos servizos públicos non se verá obstaculizada, debendo deixarse completamente libres para a súa utilización inmediata, se fose preciso, os seguintes elementos:

- a) As paradas de transporte público regularmente establecidas e os pasos de peóns en toda a súa lonxitude.
- b) As pasaxes de vehículos quedarán libres en todo o seu largo.
- c) As saídas de emerxencia en todo o seu largo.
- d) Respetarase unha distancia suficiente aos distintos elementos de mobiliario urbano, sinais de tráfico e báculos de alumeado que garanta a súa función e que permita os labores de mantemento.

9. Deberá garantirse o acceso a todos os servizos e equipamentos municipais e de compañías de servizos as vinte e catro horas do día.

O mobiliario deberá ser retirado da vía pública ao finalizar o horario de funcionamento do establecemento, agás o toldo e a tarima cando estean autorizados. En calquera caso, a tarima deberá ser retirada cando finalice o período de vixencia da autorización se esta é de tempada.

Durante o tempo comprendido entre a finalización do horario da terraza e o de funcionamento do establecemento, o titular da autorización deberá optar entre a retirada do mobiliario da vía pública ou a colocación en cada una das mesas autorizadas dun letreiro indicativo e visible, no que se especificará que a terraza non se atopa en servizo.

No caso de que o titular da autorización teña autorizado unha tarima, permitirase que o mobiliario permaneza na mesma ao finalizar o horario de funcionamento sempre que se atope debidamente amarrado para evitar actos de vandalismo.

10. Cumprirase todo o indicado na normativa en materia de promoción da accesibilidade e supresión de barreiras arquitectónicas.

Artigo 18. Prohibición de equipos audiovisuais e actuacións amplificadas en directo

Poderá haber actuacións en directo nas terrazas ata as 00,00 horas das noites de maio a setembro, e ata as 23,00 horas durante o resto do ano. Quedan terminantemente prohibidas as actuacións en directo amplificadas ou con percusión, así como a instalación de equipos ou a emisión de son nos espazos e instalacións da terraza.

Artigo 19. Particularidades para a instalación de terrazas en espazos libres privados

A instalación de terrazas en espazos libres privados someterase, ademais de ás sinaladas nos artigos 14 a 18 desta ordenanza, ás seguintes determinacións:

- a) En caso de que as actividades descritas no artigo 14 desta ordenanza se desenvolvan en espazos privados, permitirase a instalación de terrazas en toda a zona do espazo libre privado de parcela.
- b) Permiteuse a disposición de calquera tipo de quiosco ou instalación de apoio na superficie libre de parcela agás no ámbito do PEPRI, onde deberá ser autorizado polo Concello, que poderá denegar o permiso para a

instalación de calquera elemento fixo por razóns estéticas ou de cumprimento da normativa específica deste ámbito.

- c) A instalación de terrazas en espazos privados non deberá diminuír as condicións de evacuación por debaixo dos mínimos regulamentarios. O solicitante deberá presentar un estudo xustificativo de evacuación no que se teñan en conta as dimensións e mobiliario da súa terraza e a súa incidencia sobre a do conxunto do local.

Capítulo 2

Condicións específicas para a instalación de terrazas con pechamentos estables

Artigo 20. Modalidades de ocupación

1. Condicións xerais dos pechamentos estables: só se permitirá un pechamento estable por local ou establecemento mais admitirase a implantación simultánea dunha terraza sen pechamento e doutra cun pechamento estable para un mesmo establecemento. A altura exterior máxima da estrutura será de 3 metros. No interior do pechamento a altura mínima será de 2,50 metros. Os pechamentos estables contarán cun cartel indicativo do aforo máximo.

2. Pechamentos estables acaroados á fachada: con carácter xeral, o pechamento instalarase acaroado a fachada principal do establecemento, en cuxo caso só poderá ocupar a lonxitude desta, sempre que se cumpran as seguintes condicións:

- a) Que a distancia entre a parte inferior dos ocos da planta primeira e o pechamento non sexa inferior a 1,50 metros sempre que na planta primeira se sitúe unha vivenda allea ao titular do establecemento que instala a terraza.
- b) Que as condicións de seguridade, tanto do inmovible como da contorna, non se vexan afectadas pola presenza da instalación.
- c) A súa colocación no deberá dificultar a evacuación dos edificios ou locais onde se instale. A disposición dos pechamentos será homoxénea ao longo de todo o tramo de beirarrúa.

3. Pechamentos estables separados das fachadas:

3.1 Pechamentos estables en beirarrúas: a lonxitude de ocupación do pechamento será como máximo a da fachada do edificio onde se encontre o establecemento principal. Se máis dun establecemento dun mesmo edificio solicita autorización de terraza con pechamento estable nunha beirarrúa, cada un poderá ocupar a lonxitude do ancho da fronte da súa fachada repartíndose o resto do espazo de forma equitativa.

3.2 Pechamentos estables en espazos ou prazas peonís: en espazos ou prazas peonís, con carácter xeral, os pechamentos estables poderán manter unha separación máxima de dez metros con respecto á fachada do establecemento. A lonxitude de ocupación do pechamento será como máximo a da fachada do edificio onde se encontre o establecemento principal. O largo das instalacións obterase de acordo co exposto no artigo seguinte. A disposición dos pechamentos nos espazos peonís deberá ser homoxénea.

4. Os establecementos situados nos espazos libres de parcela de titularidade privada e nos respectivos patios interiores tamén poderán instalar pechamentos estables. No ámbito do PEPRI só poderán autorizarse aqueles pechamentos que autorice o Concello, que poderá denegar o permiso por razóns estéticas ou de cumprimento da normativa específica deste ámbito.

Artigo 21. Condicións do espazo no que se pretende situar

Concederase autorización para a instalación de terrazas con pechamentos estables cando estean situadas en terreos de titularidade e uso público ou nos espazos libres de parcela de titularidade privada e nos respectivos patios interiores e cumpran as condicións específicas seguintes:

- a) Nas beirarrúas a anchura mínima do espazo de tránsito peonil será igual ou superior a 2 metros.
- b) Nas rúas, paseos e prazas peonís a largura mínima de espazo de tránsito peonil será igual ou superior a 4 metros.
- c) A ocupación terá unha aliñación constante evitando quebras ao longo dunha liña de quinceiro.
- d) Aínda cando un espazo reúna todos os requisitos para a colocación dun pechamento poderá non autorizarse ou autorizarse con dimensións inferiores ás solicitadas se a súa instalación dificultara o tránsito peonil.

Artigo 22. Condicións para a instalación do pechamento estable e do seu mobiliario

1. As terrazas con pechamentos estables que se pretendan instalar dentro do ámbito do PEPRI, deberán cumprir as esixencias deste.
2. Cando a concentración de pechamentos poida xerar un grave impacto ambiental, as solicitudes para novas instalacións ou renovacións correspondentes serán resoltas conxuntamente, establecendo as condicións ou restricións que se consideren adecuadas.
3. Os elementos de mobiliario urbano que se instalen estarán suxeitos ás seguintes prescricións:
 - a) O pechamento estable e os elementos de mobiliario instalados no seu interior deberán estar homologados.
 - b) Os pechamentos nos espazos libres de parcela de titularidade privada e nos respectivos patios interiores poderán contar cunha instalación de apoio no seu interior.
 - c) Non se permite a colocación de ningún elemento no exterior do pechamento, nin fixado nin colgado del.
 - d) Nos pechamentos estables acaroados á fachada admítense a instalación de reixas de conduto de aire acondicionado con prolongación dos condutos interiores cumprindo o réxime de distancias recollido na normativa vixente.
 - e) No resto de supostos de pechamentos estables os equipos de aire acondicionado instalaranse no seu interior e as reixas cumprirán coa normativa municipal vixente en materia ambiental.
 - f) Os pechamentos estables poderán dispoñer de climatización e calefacción.
4. As terrazas con pechamentos estables non acaroadas á fachada do establecemento poderán dispoñer da correspondente acometida subterránea para o abastecemento de enerxía, de acordo co artigo 11 desta ordenanza, tomando como orixe desta a do local. Quedan prohibidas as acometidas de gas, auga ou saneamento e a utilización de aparellos que requiran como combustible materias susceptibles de estourar ou inflamarse, ou que xeren substancias desa natureza.
5. A instalación eléctrica de alumeado para a terraza deberá reunir as condición que establece o Regulamento electrotécnico para baixa tensión. Os condutos quedarán aloxados en canalizacións subterráneas. En ningún caso a iluminación poderá cegar ou producir molestias á veciñanza, viandantes ou vehículos. Esta instalación deberá ser revisada anualmente por un instalador autorizado que emitirá o correspondente boletín de conformidade, debendo presentarse unha copia deste ao órgano competente para a concesión da autorización. De acordo cos resultados da revisión determinarase a conveniencia de continuar co funcionamento do pechamento estable, que deberá ser retirado de forma inmediata polo titular cando non supere a devandita revisión.
6. As terrazas con pechamentos estables non acaroadas á fachada do establecemento disporán de extintores adecuados e alumeado de emerxencia e de sinalización, que deben contar cun contrato de mantemento e revisión por empresa autorizada.
7. As licenzas outorgadas para a construción de pasos de vehículos suporán a diminución da superficie do pechamento estable, podendo motivar a revogación da autorización. Nestes casos, o titular non terá dereito a indemnización ou compensación ningunha.
8. Non poderá obstaculizarse o acceso á calzada desde os portais dos predios, deixando despexados en toda a súa largura máis de 0,50 metros a cada lado, medidos desde as couzoeiras das portas, nin dificultar a manobra de entrada ou saída nas pasaxes permanentes.
9. A distancia dos elementos do pechamento ao bordo da beirarrúa será como mínimo de 0,50 metros, podendo ser ampliada cando razóns de interese público o xustifiquen. Os alcouves e elementos axardinados existentes no espazo en que se instale o pechamento estarán totalmente libres e serán accesibles, para cuxo fin existirá una franxa mínima de 0,50 metros ao seu arredor totalmente despexada, medida desde o seu bordo exterior, que pode ser ampliada cando o interese público así o xustifique.
10. Deberá garantirse en todo momento o acceso ás paradas de transporte público regularmente establecidas e o uso das saídas de emerxencia, dos pasos de vehículos e de peóns e dos servizos municipais de acordo co indicado a seguir:
 - a) As paradas de transporte público regularmente establecidas e os pasos de peóns en toda a súa lonxitude máis de 1 metro a cada lado.
 - b) As saídas de emerxencia quedarán libres en todo o seu largo máis dun metro a cada lado.
 - c) Os pasos de vehículos quedarán libres en todo o seu largo cando menos 50 cm a cada lado, medido desde os seus extremos na aliñación do bordo.

e) Manterase unha distancia de 1 metro en todo o seu perímetro aos distintos elementos de mobiliario urbano, sinais de tráfico, báculos de alumeado e outros servizos municipais, de modo que queden totalmente libres, se garanta en todo momento a súa función e se permitan os labores de mantemento.

Artigo 23. Prohibición de equipos audiovisuais e actuacións

As actuacións nestas terrazas serán ata as 00,00 horas da noite entre os meses de maio a setembro, e ata as 23,00 o resto do ano. Quedan terminantemente prohibidas as actuacións en directo amplificadas ou con percusión, así como a instalación de equipos ou a emisión de son no interior do pechamento estable.

Artigo 24. Terrazas con pechamentos estables en espazos privados.

Para os efectos da presente ordenanza non computarán edificabilidade as instalacións en espazos privados que reúnan as seguintes condicións:

- a) Que non teñan carácter anual, de modo que o tempo de duración da autorización non excederá de seis meses.
- b) Que as súas características construtivas se correspondan con estruturas lixeiras, prefabricadas e carentes de cimentación.

Capítulo 3

Autorizacións

Sección primeira.- Disposicións xerais

Artigo 25. Transmisibilidade

1. As autorizacións para instalar terrazas transmitiranse conxuntamente coas licenzas urbanísticas dos establecementos principais, agás renuncia expresa do novo titular que deberá comunicarse ao Concello.

2. As autorizacións para a instalación e funcionamento das terrazas non poderán ser obxecto, en ningún caso, de arrendamento ou cesión independente consonte co establecido no artigo 4 desta ordenanza.

Artigo 26. Período de funcionamento e prazo de solicitude

As autorizacións poderán ser anuais, semestrais ou trimestrais, sendo a anual a que vai desde o 1 de xaneiro ao 31 de decembro, a semestral a que vai dende o 1 de maio ao 31 de outubro, e trimestral a que vai do 1 de xullo ó 31 de setembro. As autorizacións anuais poderán permitir, de así o solicitar o interesado, un número de mesas determinado para o período do 1 de marzo ao 31 de outubro e outro número distinto para o período que vai desde o 31 de outubro ao 1 de marzo.

1. A autorización das terrazas en chan privado non excederá de seis meses cando dispoñan de instalacións que non computen edificabilidade nos termos establecidos no artigo 24. No ámbito do Plan Especial de Protección e Rehabilitación estarase ao que establece a súa normativa con respecto a estas instalacións.

2. A autorización poderá ser solicitada en calquera momento, entendéndose que a autorización se outorgará para o tempo que reste desde a concesión deica o fin do período solicitado.

Artigo 27. Vixencia e renovación das autorizacións

1. A vixencia das autorizacións que se concedan corresponderase co período de funcionamento autorizado.

2. As autorizacións que se concederan para instalacións de terrazas renovaranse automaticamente se non se produce modificación ningunha e se ningunha das partes, Administración municipal ou titular, comunica, a súa vontade contraria á renovación.

3. A Administración municipal manifestará a súa vontade contraria á renovación nos seguintes supostos:

- a) De se iniciaren procedementos dos que se desprenda a existencia de molestias ou prexuízos derivados do funcionamento da actividade principal ou accesoria posteriores á entrada en vigor da presente Ordenanza.

- b) De se apreciar un incumprimento das condicións da autorización ou da mesma ordenanza.
- c) Nos casos de falta de pagamento da taxa correspondente.
- d) Cando no período autorizado estea prevista a execución de actuacións públicas que modifiquen a realidade física existente no momento do outorgamento da autorización.
- e) Cando a terraza poida supor molestia para os usuarios da vía pública ou para os servizos públicos.

4. Nas terrazas con pechamentos estables a autorización concedida terá unha vixencia máxima, incluídas as prórrogas, de catro anos. Se a duración do uso ou aproveitamento excedese de 4 anos, estará suxeito a concesión administrativa. En todo caso, a autorización poderá ser revogada, por razóns de interese público e sen dereito a indemnización, antes da finalización do seu prazo de duración.

Dado que as autorizacións de ocupación de solo público con terrazas concédense en precario, podendo ser revocadas en calquera íntre, e non xeneran dereito á súa renovación automática sempre que razóns de interese público desaconsellan dita renovación, as terrazas de hostalería non constitúen unha ampliación dos locais de hostalería aos efectos do previsto para Zonas Saturadas, polo que poderán autorizarse novas terrazas para locais ubicados en "zonas saturadas", conforme a Ordenanza Xeral Municipal Reguladora de Contaminación Acústica (BOP 16-12-1997)

Sen perjuicio do anterior, e de conformidade co disposto neste artigo, deberá terse en conta o carácter especialmente sensible das "zonas saturadas" aos efectos de revogación das autorizacións no caso de que se iniciaren procedementos dos que se desprenda a existencia de molestias ou prexuízos derivados do funcionamento da actividade principal ou accesoria.

Igualmente, poderase fixar un horario distinto do establecido no artigo 6 desta Ordenanza para o funcionamento das terrazas ubicadas nas "zonas saturadas" cando así o aconselle o interese público ou a evitación de molestias.

Sección segunda. Procedemento

Artigo 28.Solicitante

Poderá solicitar autorización para a instalación dunha terraza o titular da licenza do establecemento.

Artigo 29.Documentación

1. As solicitudes de autorización que se presenten para a nova instalación dunha terraza ou para a modificación dunha xa concedida irán acompañadas da seguinte documentación:

- a) Fotocopia da licenza de apertura do establecemento ou referencia ao seu expediente de concesión ou transmisión.
- b) Plano de situación da terraza no que se reflicta a superficie a ocupar, largo de beirarrúa, distancia ás paradas de autobuses, saídas de emerxencia, pasos de vehículos, quioscos, así como os elementos de mobiliario urbano existentes.
- c) Plano de detalle con indicación de todos os elementos de mobiliario, así como a súa clase, número, dimensións, total de superficie a ocupar e colocación destes consonte determina o artigo 17.
- d) Autoliquidación da taxa correspondente.

1. No caso de terrazas situadas en solo de titularidade privada incluírase, ademais, como documentación específica:

- a) Acreditación da propiedade ou título xurídico que habilite para a utilización privativa do espazo.
- b) Autoliquidación da taxa correspondente.

2. Nas terrazas con pechamentos estables ou con elementos permanentes, como tarimas, mamparas, peches, etc, incluírase, ademais, como documentación específica:

- a) Memoria técnica detallando:

- As características das súas instalacións.
- Superficie que se vai ocupar e elementos instalados no interior do pechamento.
- Planos nos que se indiquen de forma inequívoca as dimensións, seccións, andares, alzados laterais, frontal e posterior.
- Sistemas de ancoraxe dos elementos ao pavimento.

b) Certificación do técnico facultativo habilitado legalmente, visada polo colexio profesional correspondente, acerca da suficiencia da súa estabilidade estrutural e da adecuación das súas condicións de prevención e extinción de incendios, evacuación, estabilidade e reacción ao lume.

c) Documento acreditativo da constitución dunha garantía para a reposición do pavimento público ao estado anterior á instalación do pechamento. O importe desta garantía determinarase en función do custo de reposición do espazo ocupado.

d) Orzamento de instalación.

e) Contrato de mantemento e revisión dos extintores e do alumeado de emerxencia e sinalización con empresa autorizada.

4. Nas solicitudes de renovación das autorizacións concedidas no período de funcionamento precedente que impliquen modificacións puntuais soamente será preciso presentar a documentación que describa a modificación.

Artigo 30. Tramitación

A primeira instalación ou modificación desenvolverase consonte o seguinte procedemento:

1. Iniciarase mediante solicitude, en impreso normalizado que conterá polo menos os datos sinalados no artigo 66 da Ley 39/2015, de 1 de outubro, del Procedimiento Administrativo Común de las Administraciones Públicas, ao que se xuntará a documentación prevista nesta ordenanza.

2. Para os efectos do cómputo dos prazos de tramitación considerarase iniciado o expediente na data de entrada da documentación completa no rexistro do órgano competente para resolver.

3. Os servizos municipais disporán dun prazo de 1 mes para examinar a solicitude e a documentación presentada e, se é o caso, requirirán ao interesado para que no prazo de 10 días emende a falta ou presente a documentación preceptiva, indicándolle que se non o fai entenderase que desistiu do seu pedimento e que, logo da resolución, se arquivará sen máis trámite, cós efectos previstos no artigo 21.1 da Ley 39/2015, de 1 de outubro, del Procedimiento Administrativo Común de las Administraciones Públicas.

4. Unha vez completada a documentación, emitirase informe técnico e xurídico que finalizará con proposta nalgún dos seguintes sentidos: De outorgamento, indicando se é o caso, os requisitos ou as medidas correctoras que a instalación proxectada deberá cumprir para se axustar á normativa aplicable

a) De denegación.

b) De outorgamento, indicando se é o caso, os requisitos ou as medidas correctoras que a instalación proxectada deberá cumprir para se axustar á normativa aplicable.

5.- A resolución do órgano competente deberá producirse nun prazo non superior a 2 meses contados desde o día seguinte á data na que se considere iniciado o expediente. Transcorrido este prazo sen que houbera resposta, entenderase que a autorización foi rexeitada.

TÍTULO II

Réxime disciplinario e sancionador

Capítulo 1

Restablecemento da legalidade

Artigo 39. Compatibilidade

1. As responsabilidades administrativas que resulten do procedemento sancionador serán compatibles coa esixencia ao infractor da reposición da situación alterada ao seu estado orixinario, así como coa indemnización polos danos e perdas causados.

2. Non obstante, tanto nos procedementos de restablecemento da legalidade como nos sancionadores poderanse acordar medidas cautelares, como a retirada das instalacións ilegais ou a suspensión do funcionamento da terraza, consoante a o disposto na normativa sobre procedemento administrativo común.

Capítulo 2

Infraccións e sancións

Artigo 40. Infraccións

Serán infraccións conta esta ordenanza as accións ou omisións que contraveñan o disposto nela.

Artigo 41. Suxeitos responsables

Serán responsables das infraccións as persoas físicas ou xurídicas titulares das instalacións.

Artigo 42. Clasificación das infraccións

As infraccións desta ordenanza clasifícanse en leves, graves e moi graves.

1. Son infraccións leves:

- a) A falta de ornato ou limpeza da instalación ou da súa contorna.
- b) O incumprimento do horario de inicio ou de peche en menos de 1 hora.
- c) Almacenar ou amontoar produtos, envases ou residuos na zona de terraza ou en calquera outro espazo da vía pública.
- d) O incumprimento de calquera outra obriga prevista nesta ordenanza que non sexa constitutiva de infracción grave ou moi grave.

2. Son infraccións graves:

- a) A comisión de tres faltas leves ao cabo de 1 ano cando así se declarase por resolución firme.
- b) O incumprimento do horario de inicio ou de peche en máis de 1 hora.
- c) A instalación de elementos de mobiliario urbano non previstos na autorización ou en número maior dos autorizados.
- d) A ocupación dunha superficie maior á autorizada en máis do 25 por cento e en menos do 75 por cento ou o incumprimento doutras condicións da delimitación.
- e) O servizo de produtos alimentarios non autorizados.
- f) A carencia do seguro obrigatorio.
- g) A instalación de instrumentos ou equipos musicais ou outras instalacións non autorizadas ou fóra do horario ao que se limitaran nos quioscos que os teñan autorizados.

- h) A ocultación, manipulación ou falsificación dos datos ou da documentación presentados para a obtención da correspondente autorización.
- i) A non presentación do documento de autorización e do plano de detalle aos axentes da autoridade ou funcionarios competentes que o requiran.
- j)) O incumprimento da obriga de retirar ou recoller e amontoar o mobiliario da terraza ao finalizar o seu horario de funcionamento.

3. Son infraccións moi graves:

- a) A instalación de terrazas sen autorización ou fóra do período autorizado.
- b) A ocupación dunha superficie maior á autorizada en máis do 75 por cento.
- c) O incumprimento da orde de suspensión inmediata da instalación cando disto derive unha perturbación relevante da convivencia que afecte de maneira grave, inmediata e directa á tranquilidade ou ao exercicio de dereitos lexítimos doutras persoas ou dificulte o uso ou funcionamento dun servizo público ou supoña unha deterioración grave de equipamentos, infraestruturas, instalacións de servizos públicos, espazos públicos ou calquera das súas instalacións.
- d) A celebración de espectáculos ou actuacións non autorizadas de forma expresa.
- e) O incumprimento do horario de inicio ou de peche en máis de 1 hora, cando disto derive unha perturbación relevante da convivencia que afecte de maneira grave, inmediata e directa á tranquilidade ou ao exercicio de dereitos lexítimos doutras persoas.

Artigo 43. Sancións

A comisión das infraccións previstas nesta ordenanza levará emparellada a imposición das seguintes sancións: As infraccións leves sancionaranse cunha multa de ata 750 euros.

As infraccións graves sancionaranse cunha multa de ata 1.500 euros e a revogación da autorización se concorren as circunstancias agravantes previstas no artigo seguinte.

As infraccións moi graves sancionaranse cunha multa de ata 3.000 euros e revogación da autorización.

Artigo 44. Circunstancias modificativas da responsabilidade

Para a modulación das sancións atenderase á existencia de intencionalidade ou reiteración, natureza dos prexuízos causados, reincidencia na comisión ao cabo dun ano de tres infraccións da mesma natureza cando así o declare resolución firme e ao beneficio obtido coa súa realización.

Artigo 45. Procedemento

A imposición das sancións requirirá a previa incoación e instrución do procedemento correspondente, que se substanciará consonte ao disposto na lexislación xeral sobre procedemento administrativo común e o seu regulamento de desenvolvemento. O acordo de iniciación poderá ordenar a adopción de medidas provisionais que resulten necesarias para garantir a eficacia da resolución que puidera recaer, tales como a retirada das instalacións ilegais ou a suspensión do seu funcionamento.

Artigo 46. Autoridade competente

A incoación e resolución dos procedementos sancionadores corresponderá ao órgano competente para conceder a correspondente autorización.

Artigo 47. Prescrición

Os prazos de prescrición das infraccións e sancións serán os previstos na lexislación xeral sobre procedemento administrativo común.

DISPOSICIÓN ADICIONAIS

Primeira.- Non se concederá ningunha autorización de terraza se o establecemento principal non dispón previamente da placa identificativa prevista na Ordenanza Xeral Municipal Reguladora De Contaminación Acústica (BOP 16-12-1997).

Segunda. Habilitase á Alcaldía-Presidencia para dictar as disposicións ou instrucións necesarias para o desenvolvemento e aplicación da presente ordenanza.

DISPOSICIÓN TRANSITORIAS

Primeira. As autorizacións concedidas con anterioridade á entrada en vigor desta ordenanza para a instalación de terrazas quedan revogadas desde a data da súa entrada en vigor.

DISPOSICIÓN DERROGATORIA

Quedan derogados aqueles artigos da actual Ordenanza de circulación e uso da vía pública e os da vixente Ordenanza Xeral Municipal Reguladora de Contaminación Acústica (BOP 16-12-1997), así como cantas disposicións de igual ou inferior rango, que se opoñan ao establecido nesta ordenanza.

As actividades complementarias desenvolvidas polos establecementos de hostalería no exterior, tanto no chan público coma no privado, non estarán sometidas ás limitacións do illamento acústico ou aos límites máximos de ruído permitidos no exterior. Non obstante, en ningún caso se producirán ruídos que superen en espazos lindantes, horizontais ou verticais, os niveis fixados como niveis de recepción pola ordenanza xeral municipal reguladora da Contaminación Acústica (BOP 16-12-1997).

En todo caso, os espazos dedicados a estas actividades complementarias non poderán dispoñer de equipos de música así como outros elementos que sexan susceptibles de producir ruídos.

A autorización está condicionada á inexistencia de molestias, que se probará coa correspondente medición sonométrica cuxo custo se liquidará ao titular da actividade a cuxo servizo se instalou a terraza. A existencia de ruídos que superen os límites permitidos en espazos lindantes, horizontais ou verticais, cuxo foco sexa a actividade de terraza autorizada con licenza, determinará a revogación desta previa audiencia e a retirada da terraza a costa do interesado.

Coa solicitude de ocupación dos espazos privados de uso público, o solicitante debe manifestar acordo expreso coa anterior condición e achegar Memoria na que se xustifique:

1. O impacto da actividade no entorno, valorando a superficie do patio ou espazo privado onde se cubique, aportando plano a escala da ocupación;
2. O uso dos edificios colindantes, a súa distancia e solución construtiva.
3. Exposición razoada acerca do impacto da nova instalación sobre o ruído existente, o nivel de emisión previsto e cómo afectaría ás vivendas do entorno.

DISPOSICIÓN FINAL

Publicación, entrada en vigor e comunicación:

Esta norma entrará en vigor aos quince días seguintes á data da publicación no BOP, unha vez aprobada definitivamente.